

– A be, amala, me akana kay nanay man pares, so ka dav kalke chhaves? Napravo hohavzhom len imish. Akana kana ka merav, nanay so te dav kalke chhavenge. So te kerav lentsa? Vaker mange tu?

Pale irisalilo leskoro amal, dimi si but barvalo li ov:

– Shun akana, amala! Hale tuke kalka pares – tselo kisiya si, garav la. Ma de nikaske. A kavka chhavo kay arakhela tut, de len leske kay avena te divesa.

I ov da garavzhas o pares.

I avela kavka chhavoro, o choro i vakerela leske:

– Dikh man chedo, ake o pares, garavava len me. Kana avel o meribe me ka vakerav tuke kate si.

O phuro manush lel kolka pares. Thovel len andi ekh piri, ingaldzhas la pash ki ekh kashteste, parundzhas lee othe. I kana lilyas veche te uhchel, astardzhas te parvarel pes shukar.

Nakhile brecha. Ahavdyas akana o phuro, kay ka merel i vakerela:

– E, chedo! Khidine sare me chhaven, akana. Neka aven sare katka te dikhen man. Te lav mange lendar halaylakos, kay dikhle man. Te len ola mandar halaylakos – so kerde, so na kerde. Me te lav mange lendar. Zha akana chedo, ikal kolka pares okotar e kyupesa kolke kashtestar.

Jala kovka akana chhavoro, ikalela o pares, anela len. O phuro vakerela lenge:

– Chedo, tume mozhe te dikhle man, ama sare mukhle man khulalo, melalo, bokhalo. Ama ya, kavka chhavoro thovdyas man. Akana sare o pares ka dav len kalke chhaveske, soske dikhlyas man. Dikhlen li akana o pares, dikhen li kobor pares isi ko sasto kyupi. Kana ka merav da me, tumen nakamava te aven. Ya, kavka chhavoro parunel man. Shukar li ka parunel man, nafela li ka parunel man – leskere vastende sinyom, tumare vastende na sinyom, soske tume mukhle man. Ni halaylakos mandar lile, ni pale te vakeren mange halaylakos. Achhoven chedo, sastipnasa garek.

Nashle peske ola. Kay alo o phureskoro dives, o chhavoro kergyas pi buti. Ov parundyas e phures, ov ingaldyas les.

